

摛藻堂四庫全書薈要

集部

欽定四庫全書叢要

集部

宋詩鈔卷七十二

詳校官候選知縣臣吳甸華



欽定四庫全書叢要卷二萬三百二十五

集部

宋詩鈔卷七十二

內閣中書舍人吳之振編

楊萬里荆溪集鈔

丁酉四月一日之官毘陵舟行阻風宿稠波江口

蟲聲兩岸不堪聞把燭銷愁且一尊誰宿此船愁似我
船篷猶帶燭煙痕

千里江山一日程出山似被北風嗔東窗水影西窗月

併照船中不睡人

餘干汎流至安仁

半篙新漲滿帆風兩岸千山一抹中慙愧耀郎能袖手
若非袖手更無功

宿小沙溪

樹浦山煙補缺雲風搖花雨作香塵綠楊儘道無情著
何苦垂條拂路人

諸峯知我厭泥行捲盡癡雲放嫩晴不分竹梢含宿雨

時將殘點滴寒聲

玉山道中

村北村南水響齊巷頭巷尾樹陰低青山自負無塵色
盡日殷勤照碧溪

過招賢渡

余昔歲歸舟經此水涸舟膠旅情甚惡

歸舟曾被此灘留說著招賢夢亦愁五月雪飛人不信
一來灘下看濤頭

一江故作兩江分立殺呼船隔岸人柳上青蟲寧許劣
垂絲到地却回身

倦游客子自無聊不是江山景不饒危岸崩沙新改路
斷渠橫石自成橋

岸上行人莫歎勞長年三老正呼號也知灘惡船難上
仰踏桅竿卧看篙

舟過德清

人家兩岸柳陰邊出得門來便入船不是全無最佳處

何窗何戶不清妍

舟泊吳江

江湖便是老生涯
佳處何妨且泊家
自汲松江橋下水
垂虹亭上試新茶

東是吳江西太湖
長橋橫截萬尋餘
江妃舞倦凌波襪
玉帶圍腰攬鏡初

暮立荷橋

欲問紅蕖幾答開
忽驚浴罷夕陽催
也知今夕來差晚

猶勝窮忙不到來

秋熟追涼池上

圃迥人全寂池清慮自消萍根微著水荷葉欲穿橋今
歲知何故秋陽爾許驕追涼猶有處此老未無聊

蠟梅

天向梅梢別出奇國香未許世人知殷勤滴蠟緘封却
偷被霜風折一枝

登淨遠亭

池冰受日未全開旋旋波痕百皺來野鴨被人驚得慣
作羣飛去却飛回

戊戌正月二日雪作

雪與新春作伴回擣霜為片雹為埃只愁雪虐梅無奈
不道梅花領雪來

夢回紙帳怪生寒童子傳呼雪作團已被曉風融作水
頭巾不裹起來看

戲贈子仁姪

小阮新來覓句忙自攜破硯汲寒江天公念子抄詩苦
借與朝陽小半窗

雪夜尋梅

去年看梅南溪北月作主人梅作客今年看梅荆溪西玉為
風骨雪為衣臘前欲雪竟未雪梅花不憒人間熱橫枝憔悴
涴晴埃端令羞面不肯開縞裙夜訴玉皇殿乞得天花來作
伴三更勝六駕海神先遣東風吹玉塵梅仙曉沐銀浦水冰
膚別放瑤林春詩人莫作雪前看雪後精神添一半

雪霽出城

梅於雪後較多花草亦晴初忽幾芽河凍落痕餘一寸
殘冰閣在柳根沙

正月十九日五更詣天慶觀謝雪聞都下尺雪旬
日而毗陵三四微雪而已

元宵風物又闌殘閑閣何曾出一看尚覺燭光欺病眼
旋添衣著試春寒中都尺雪逾旬許此地飛花逐片乾
不待珠宮香火了海風吹上紫金盤

寒夜不寐

雪入迎春鬢茶醒學古胸夢回霜滿屋吟到月斜鐘
小飲俎豆頗備江西淮浙之品戲題

滿盤山海眩芳珍未借前籌已嚥津蠻醬子魚總佳客
玉狸黃雀是鄉人

味含霜氣洞庭柑鮓帶桃花楚水蜮春暖著人君會否
不教淮白過江南

雨霽

雨為梅花遣盡塵柳勾日影自傳神不須苦問春多少
暖幕晴簾總是春

春暖郡圃散策

已覺朝來退祫衣日光風力軟如癡倩誰留許春寒著
更放梅花住少時

萱草行間過履絰杏花影裏散文書秋風遣我疎團扇
又被春風遣喚渠

春禽處處講新聲細草欣欣賀嫩晴曲折遍穿花底路

莫令一步作虛行

燒香七言

琢甃作鴟碧於水削銀為葉輕如紙不文不武火力勻
閉閣下簾風不起詩人自炷古龍涎但令有香不見煙
素馨忽開抹利折低處龍麝和沉檀平生飽識山林味
不奈此香殊斌媚呼兒急取烹木犀却作書生真富貴

書齋夜坐

棐几吹燈丈室虛隔窗雨點響階墀胡牀枕手昏昏著

卧聽兒童讀漢書

酒力欺人正作眠
夢中得句忽醒然
寒生更點當當裏
雨在梅花簌簌邊

二月十四日梅花

雨打知無那春暄
絕不禁小風千點
雪落日一簷金樹
勁春猶瘦花寒暮
更明平生豈無句
此外不須清

水仙花

額間拂殺御袍黃
衣上偷將月姊香
待倩春風作媒却

西湖嫁與水仙王

開處誰為伴蕭然不可親雪宮孤美影水殿四無人

夜坐

背壁青燈觀讀書窺窗素月喚看渠向來諸老端何似
未必千年便不如春後春前雙雪鬢江南江北一茅廬
只愁夜飲無供給小雨新肥半圃蔬

新柳

柳條百尺拂銀塘且莫深青只淺黃未必柳條能蘸水

水中柳影引他長

禱雨報恩因到翟園

霧氣初迎日脚開春光偏傍柳邊回寒暄消息何人會
十指今朝出袖來

垂絲海棠

無波可照底須窺與柳爭嬌也學垂破曉驟晴天有意
生紅新曬一絢絲

送羅永年西歸

梅萼香邊踏雪來
杏花雨裏帶春回
明朝解纜還千里
今日看花更一杯
誰遣文章太驚俗
何緣瑣屋不遺才
南溪鷗鷺如相問
為報春吟費麝煤

讀唐人及半山詩

不分唐人與半山
無端橫亂對詩壇
半山便遣能參透
猶有唐人是一關

春興

著盡工夫是化工
不關春雨更春風
已拚膩粉塗雙蝶

更費雌黃滴一蜂

春曉

風光明淑奈渠何
非暖非寒真是和
春到千花俱有分
海棠獨自得春多

米囊花

鳥語蜂喧蝶亦忙
爭傳天詔詔花王
東皇羽衛無供給
探借春風十日糧

曉寒

黯黯輕寒淡淡陰遊人便覺減行春春風也解嫌蕭索
自送鞦韆不要人

春光喚入百花叢寒力平欺兩鬢蓬吹亂衆紅還復整
海棠却不怕春風

上巳

上巳春陰政未開寒窗愁坐冷如灰凍蠅觸紙飛還落
仰面翻身起不來

雨冷風酸數日強老懷不可更禁當春寒幸自將歸去

喚取重來是海棠

正是春光最盛時桃花枝映李花枝鞶韁日暮人歸盡
只有春風弄彩旗

寒食雨作

雙燕衝簾報禁煙喚驚畫夢聳詩肩晚寒政與花為地
曉雨能令水作天桃李海棠聊病眼清明寒食又來年
老來不辨凋新句報答風光且一篇

寒食相將諸子遊翟園

鹿蕙舊種菊新栽幽徑深行忘却回忽有野香尋不得
蘭於石背一花開

柳條老去尚青鮮下有清渠遶野田波面落花相趁走
避風爭泊岸傍邊

兒曹健走儘從渠老腳微酸半要扶未委前頭花好否
且令蜂蝶作前驅

三月風光一歲無杏花欲過李花初柳絲自為春風舞
竹尾如何也學渠

荆溪老守底風流哦就千詩一笑休天欲做春無去處
只堆濃綠柳梢頭

三月十日

纏着桃李錦成圍忽便園林綠作堆遠草將人雙眼去
飛花引蝶過牆來薄書節裏無多著懷抱朝來得好開
已是七分春去了何須鳥語苦相催

清明雨寒

整冠忽見鏡中霜挽樹渾無蒂上香已貯春愁過萬斛

更令細細著升量

桃李一空春已歸不須更待絮飛時
閉門獨琢春寒句只有輕風細雨知

莫嫌細雨苦飄蕭政要寒聲伴寂寥
杏葉猶疎不成響且將紙瓦當芭蕉

風欹衆柳自成妍雨泣殘花不忍看
急喚麴生嘗杏子及渠小苦未生酸

題山莊草蟲扇

風生蚱蜢怒鬚頭紈扇圍圓璧月流三蝶商量探花去
不知若个是莊周

清明果飲二首

南溪清酒碧於江北地鵝梨白似霜頰却老人山作玉
更加食邑醉為鄉春光如許天何負雨點殊疎燕不妨
絕愛杞萌如紫蕨為烹茗椀洗詩腸

深著爐香淺著杯杯行儘緩莫教催可憐花樹渾無賴
下却簾鉤也入來雪藕新將削冰水蕉霜只好點青梅

明年寒食還家去却憶荆溪花正開

次李倅子壽郡集詩韻

蒼碧新煎第二泉博山深炷古龍涎草玄顧我非揚子能賦如公是仲宣詩社自甘編下戶醉鄉何苦不開邊窮州地主慙司業不解時時與酒錢

櫻桃

櫻桃一雨半彫零更與黃鸝翠羽爭計會小風留紫脆殷勤落日美紅明摘來珠顆光如濕走下金盤不待傾

天上薦新舊分賜兒童猶解憶寅清

予舊在奉常孟夏太廟薦櫻桃禮官

各分賜四籃奉

常有寅清堂

多稼亭前兩檻芍藥紅白對開二百朵

紅紅白白定誰先
嫋嫋娉娉各自妍
最是倚欄嬌分外
却緣經雨意醒然
晚春早夏渾無伴
暖艷晴香正可憐
好為花王作花相
不應只遣侍甘泉

論花者牡丹王芍藥近侍

六月六日小集

新蟬聲澁亦無多強
與嬌鶯和好歌盡日
舞風渾不倦

無人奈得柳條何

登多稼亭曉望

風不能銷曉霧痕天猶未放宿雲根城腰褶處纔三徑
山觜前頭別一村

午熱登多稼亭

矮屋炎天不可居高亭爽氣亦元無小風不被蟬餐却
合有此涼到老夫

御風不必問雌雄只有炎風最不中却是竹君殊解事

炎風篩過作清風

卧治齋晚坐

閉戶坐不得開窗竚微涼樹林蔭白日几研生碧光信
手取詩卷細哦三數章初披頗欣愜再覽忽感傷廢卷
不能讀起行遶胡牀古人恨如山吾心澹於江本不與
彼謀云何斷我腸感罷翻自笑一蟬催夕陽

憇懷古堂

新葺懷古堂舊臨郭璞池去歲夏徂秋無日不此嬉茨

姑無暑性矣蕖有涼姿今年池水乾老子來遂稀豈惟
來不留亦復去靡思朝來偶一到又覺景物奇水含霽
後光荷於風處欹便有白鷗下驚起翠羽飛方池灔窗
東長池橫簷西紅綠向背者觴詠朝夕宜此堂初無情
此池諒何知如何涉斯世乖逢亦有時

望雨

雲興畫山頂雨放太湖脚初愁望中遠忽在頭上落白
羽障烏巾衣袖已沾渥歸來看簷溜如瀉萬仞壑霆裂

大瑤甕電紫濕銀索須臾水平培花塢濕半角定知秧
疇滿想見田父樂向來春夏交旱氣亦太虐山川已徧
走雲物竟索莫雙鬢愁得白兩膝拜將剝早知今有雨
老懷枉作惡

聞一二故人相繼而逝感歎書懷

故人昔同朝與遊每甚歡豈緣勢利合相得文字間有
項各補外不見今六年我來荆溪上敲榜索租錢故人
復雙入飛上青雲端我雖世味澹羨心能恝然忽傳故

人去得書墨未乾又傳故人亡驚悼摧肺肝與貴良獨
佳安貧未遽賢向以我易彼安知不作難今以彼易我
試問誰當慳如何捐此軀必要博好官顧謂妻與子官
滿當歸田我賤汝勿羞我貧汝勿歎從汝丐我身百年
庶團欒妻子笑答我脩短未易言富貴必速殞郭令當
天殘貧賤果永算顏子壽必延我復答渠道薄命我自
憐我福胥如郭我德敢望顏造物本嗇與我乃多取旃
借令彼不怒退省我獨安汝言自有理我意不可還

晚步追涼

老眼偏明遠岫孤夕陽故遣樹陰疎蟬鳴葉底無尋處
隨意閒行偶見渠

風不須多只是涼穿花度柳到人傍細吹病耳颼颼響
徐弄輕衫拂拂長

曉坐荷橋

四葉青蘋照綠池千重翠蓋護紅衣蜻蜓空裏元無見
只見波間仰面飛

碧玉山邊白鳥鳴綠楊風裏翠荷聲草花踏碎教人惜
為勒芒鞋欸欸行

簾影窺池到藕根水光為我弄朝暎魚兒解作晴天雨
波面吹成落點痕

池亭

小沼纔墻下孤亭恰水邊揩磨一玉鏡上下兩青天可
惜無多水難堪著釣船今年非不暑每到每醒然

凝露堂前紫薇花兩株每自五月盛開九月乃衰

似癡如醉弱還佳露壓風欺分外斜誰道花無紅百日
紫薇長放半年花

暮雨既霽將兒輩登多稼亭

一霎滂沱一霎晴簷間點滴尚殘聲水將樹影亂揉碎
月與日光相對明試數六宵還五雨坐令夏熟作秋清
兒曹小住休歸去更聽風蟬仔細鳴

苦熱登多稼亭

日脚斜紅欲暮天倚欄垂手弄雲煙兩行相對樹如許

一葉不搖風寂然
剩欲啜茶還罷去
却愁通夕不成眠
黑絲半把垂天外
白雨初生遠嶺邊

吏散庭空便悄然
不須休日始偷閒
鷗邊野水水邊屋
城外平林林外山
偶見行人回首却亦看
老子立亭間暮蟬向苦催
歸急只待涼生月半環

暮熱遊荷池上

細草搖頭忽報儂
披襟攔得一西風
荷花入暮猶愁熱
低面深藏碧傘中

月下果飲

恰則天方暮如何月正中一年無此熱今夕絕無風早
藕凝鬆雪新菱剝礮紅醉鄉堪避暑只合著衰翁

梳頭有感

身在荷香水影中曉涼不與夜來同且拋書冊梳蓬鬢
移轉胡牀受小風

同郡同年揔八人七人零落一人存如何獨立薰風裏
猶恐霜華點鬚根

晚涼散策

飯餘浴罷趁涼行偶憇池頭最小亭醉倚胡牀便成睡
夢聞荷氣忽然醒

閏六月立秋後暮熱追涼郡圃

夏欲盡頭秋欲初小涼未苦爽肌膚夕陽幸自西山外
一抹斜紅不肅無

靜坐池亭

胡牀倦坐起凭欄人正忙時我正閒却是閒中有忙處

看書纔了又看山

秋暑

半柳斜陽半柳陰一蟬飛去一蟬吟岸巾亭子鉤欄角

送眼江村松樹林

讀白元長慶二集詩

讀徧元詩與白詩一生少傳重微之再三不曉渠何意
半是交情半是私

瓶中紅白二蓮

紅白蓮花共玉瓶
紅蓮韻絕白蓮清
空齋不是無秋暑
暑被花銷斷不生

揀得新開便折將
忽然到晚斂花房
只愁花斂香還減
來早重開別是香

白蓮半荅未開時
看作紅蓮更不疑
到得欲開渾別了
玉膚洗退淡胭脂

早起

不分老鈴下苦來
驚我眠要知甘寢處
最是欲明天未

了公家事難消月俸錢坐曹臨訟罷殘燭正熒然

感秋

今歲五十二豈為年少人荷涼欣暑退蟬苦怨秋新澹
慮翻成感彫詩不著塵小兒知得句欲掉小烏巾

南國初涼日東吳欲盡頭露荷幽馥曉雲日淡炎秋也
愛西風爽其如半老休蟬聲與蛩響計會兩催愁

雨後清曉梳頭讀書懷古堂

宿雨猶涼在晨陰欲霽初移牀近秋水正面對芙蓉園

扇淒無彩生衣凜覺疎欲歸仍小住更讀數行書

檜徑曉步

雨歇林間涼自生風穿徑裏曉逾清意行偶到無人處
驚起山禽我亦驚

謝尤延之提舉郎中自山間惠訪長句

淮南使者郎官星瑞光夜燭荆溪清平生龐公不入城
令我折却屐齒迎交遊雲散別如雨同舍諸郎半為土
二老還將兩鬢霜三更重對孤燈語向來南宮綾錦堆

南窗北窗桃李開先生誦詩舌起雷一字不似人間來
劄藤染出梅花賦句似梅花花似句幾年金鑰秘銀鉤
玉筯不施恐飛去秋風呼酒荷邊亭主人自醉客自醒
儂能痛飲渠不飲飲與不飲俱忘形鬢今如霜心如水
功名一念扶不起儂歸螺山渠惠山來歲相思二千里

秋懷

隨分哦詩足散愁老懷何用更冥搜聿來胥宇蟻移穴
無以為家燕入秋蓋世功名吹劍首平生憂患浙矛頭

從今歸去便歸去未到無顏見白鷗

新涼感興

初退生衣進熟衣
新涼只與睡相宜
草爭人迹微疎處
荷怯秋風欲動時
又是一年將過眼
如何兩鬢不成絲
中元節後新來懶
章冊纔抄第二詩

中秋前一夕攜酒與子仁姪登多稼亭

月忽飛來墮我傍
我還飛入月中央
如何桂樹許多影
不隔冰輪此子光
自古中秋多苦事
非風即雨斷人腸

醉來不信寒欺酒露濕杯盤凍作霜

重九前五日再遊翟園

翟園不到纔幾日寒梢冷葉秋蕭瑟只有黃花數點明
上照青松下蒼石記得春頭來此嬉梅花太瘦杏花肥
巷南巷北皆春色恰似吾人年少時忽怪翟園許多老
園應笑我衰容早來歲春光更一來我衰依舊園還少

速子仁姪南歸

酒為吾人綠花知九日黃風燈秋焰冷霜雁夜聲忙愛

子文無對嗟予老更狂相分即相見不待半年強

再歲來相歎三杯忽語離忍將衰老淚滴作送行詩子
去儂猶住身留夢亦隨南溪舊風月千萬寄相思

食老菱有感

幸自江湖可避人懷珠韞玉冷無塵何須抵死露頭角
荷葉荷花老此身

醉吟

古人亡古人在古人不在天應改不留三句五句詩安

得千人萬人愛今人只笑古人癡古人笑君君不知朝
來暮去能幾許葉落花開無盡時人生須要印如斗不
道金槌控渠口身前只解皺兩眉身後還能更杯酒李
太白阮嗣宗當年誰不笑兩翁萬古賢愚俱白骨兩翁
天地一清風

懷山莊子仁姪

危亭獨上忽彷徨欠箇山莊隨我傍却是向來相聚日
老懷未解憶山莊

吾家小阮未西歸日日相從郡圃嬉黃菊拒霜今笑我
先生也有獨來時

晚登淨遠亭

簿書纔了晚衙催且上高亭眼暫開野鴨成羣忽驚起
定知城北有船來

黃菊

鶯樣衣裳錢樣裁冷霜涼露漣秋埃比他紅紫開差晚
時節來時畢竟開

晚登子城

鞋響秋霜後襟暄野日初寒溪半灣落遠樹一行疎老
矣端何苦歸哉不願餘終更猶半歲作麼度居諸

迓使客夜歸

去時岸樹日猶明歸到州橋月已昇水與天爭一輪玉
市聲人語兩街燈迎來送往鬚成雪索筆題詩研欲冰
淨洗紅塵煩碧酒倦來不覺睡騰騰

病後霜威不見饒吟邊月色若相撩重簾垂地寒猶入

晝燭無風影自搖誰遣塵埃空老去何曾鷗鷺不吾招
坐來已是愁無奈草露蟲聲政寂寥

起視青天分外青滿天一點更無星忽驚平地化成水
乃是月華光滿庭筆下何知有前輩醉中未肯赦空瓶
兒曹夜誦何書冊也遣先生細細聽

病身已怯九秋涼也復移尊下砌傍只愛杯中都是月
不知身上幾多霜清愁舊覺天來遠寒夜新添歲樣長
不是傍人俱欲睡老人無睡亦何妨

城頭秋望

秋光好處頓胡牀旋喚茶甌淺著湯渴樹漏天青破碎
驚風度竹碧匆忙

未得霜晴未是晴霜晴無復點雲生鶩鶩不遣魚驚散
移腳雅愁水作聲

生酒歌

生酒清如雪煮酒赤如血煮酒不如生酒烈煮酒只帶
煙花氣生酒不離泉石味石根泉眼新汲將麵米釀出

春風香坐上豬紅間熊白甕頭鴨綠變鵝黃先生一醉
萬事已那知身在塵埃裏

夜雨

幽人睡正熟不知江雨來驚風颯然起聲若山嶽摧起
坐不成寐萬感集老懷憶年十四五讀書松下齋寒夜
耿難曉孤吟悄無儕蟲語一燈寂鬼啼萬山哀雨聲正
如此壯心滴不灰即今踰知命已先十年衰不知後此
者壯心肯更回舊學日荒蕪書冊久塵埃聖處與天似

而我老相催坐念慨未已東窗晨光開

芭蕉雨

芭蕉得雨便欣然終夜作聲清更妍細聲巧學蠅觸紙
大聲鏘若山落泉三點五點俱可聽萬籟不生秋夕靜
芭蕉自喜人自愁不如西風收却雨即休

苦吟

蟻無秋衣雁有裘霜天謀食各自愁雁聲寒死叫不歇
蟻膝凍僵行復休先生苦吟日色晚老鈴來催喫朝飯

小兒誦讀呼不來案頭冷却黃蘿麪

毘陵郡齋追憶鄉味

坐無黃雀牛尾狸荆溪日日思江西若無鵝梨與海錯
江西却恐思荆溪舊居江西不自惜到得荆溪却追憶
明年官滿歸江西却憶荆溪再難得江珍海錯各自奇
冬裘何曾羨夏絺鵝梨黃雀無不可荆溪江西不關我

和張漢直

宛水吹波解舫齋南徐弔古上高臺岸巾過我燈前語

贈句清於月底梅對著酒船手持蟹管渠秋井骨生苔
壁間挂舌難能許一斗百篇真快哉

齋房戲題

長瓶舉我充自代短檠留人為莫逆醉鄉無日不瓜時
書圃何朝無菜色欲從舉者便彈冠回顧石交難對席
子墨客卿善運籌更問渠儂決去留墨卿轉問子虛子
欲說還忘一笑休

太平寺水

郡人徐友畫
清濟貫河

太平古寺劫灰餘夕陽惟照一墻孤得來看還不樂
竹塹荒處破殿虛偶逢老僧聽僧話道是壁間留古畫
徐生絕筆今百年祖師相傳妙天下壁如雪色一丈許
徐生畫水纔盈堵橫看側看只麼是分明是畫不是水
中有清濟一線波橫貫萬里濁浪之黃河雷奔電卷儘
渠猛獨清元自不隨他波痕盡處忽掀怒攬動一河秋
色暮分明是水不是畫老眼向來元自誤佛盧化作金
施樓銀山雪堆風打頭是身飄然在中流奪得太一蓮

葉舟僧言此畫難再覓官歸江西却相憶并州剪刀剪
不得鵝溪足絹官莫惜貌取秋濤懸坐側

晚風寒林

已是霜林葉爛紅那禁動地晚來風寒鴉可是矜渠黠
踏折枯梢不墮風

樹無一葉萬梢枯活底秋江水墨圖幸自寒林俱淡筆
却將濃墨點棲鳥

不寐聽雨

雨到中宵寂不鳴只聞風拂樹梢輕瓦溝收拾殘零水
併作簷間一滴聲

夜雨獨覺

枕上還鄉枕上回更更點點把人催雨將苔砌滴到曉
風揀荻簾疎處來每到周年每多感不教睡眼不曾開
來宵我識華胥路莫近茶甌近酒杯

夜聞風聲

作寒作暑無處避花落花開儘他意只有夜聲殊可憎

偏攬愁人五更睡幸自無形那有聲無端樹子替渠鳴
斫盡老槐與枯柳更看渠儂作麼生

釀醬

忽有瓶罌至捲將江海來玄霜凍龜殼紅霧染珠胎魚
鮓兼蝦鮓奴才更婢才平章堪一飯斷送更三杯

節日新晴歸自天慶

初日明雁腹酸風迎馬頭如何一雨過添却滿城秋樓
觀色俱喜槐榆影獨愁節中公事少吏散得吾休

城上野步用轆轤體

初勁無遺暖晴行失老懷紫飛楓骨立萍盡沼奩開路
好仍回首泥殘敢放鞋登臨不須盡留眼要重來

晚興

老來懷抱向誰開歲晚無花薦一杯處分新霜且留菊
辟差寒日早開梅只教詩句清如雪看得榮名細似埃
管葛諸人端解事也曾遭我笑渠來

池亭雙樹梅花

開盡梅花半欲殘兩株晴雪作雙寒團
纈遠樹元無見只合池亭隔水看

多稼亭前小步

櫻桃開過隔牆苔芍藥叢抽刺土芽最是蜜蜂無意思
忍將塵脚涴梅花

以糟蟹洞庭甘送丁端叔端叔有詩因和其韻

斗州只解寄鵝毛鼎肉何曾饋百牢驅使木奴供露顆
催科郭索獻霜螯鄉封萬戶只名醉天作一丘都是糟

却被新詩太清絕喚將雪虐更風饕

凍蠅

隔窗偶見負暄蠅雙脚接掌弄曉晴日影欲移先會得
忽然飛落別窗聲

壕上書事

十里長壕展碧漪波痕只去不曾歸鶩鷺已飽渾無幹
獨立朝陽理雪衣

冬至前三日

故山千里幾時回又見初陽動琯灰酒不逢人還易醉
詩如得句偶然來

朝飯罷登淨遠亭

近水孤亭迥紫城一逕斜霜林烏鵲國冰岸鷺鷺家殊
覺冬曦暖還拈小扇遮傳呼惠山水來淪建溪茶

近節

節裏非無事忙中自有閒因風煩白鳥折簡喚青山詩
卷一兩冊齋房三四間興來長得句却道在虛寰

蠟梅

栗玉圓彤蓄金鐘細著行來從真蠟國自號小黃香夕
吹撩寒馥晨曦透暖光南枝本同姓喚我作他楊

江梅珍重雪衣裳薄相紅梅學杏裝渠獨小參黃面老
額間豔豔發金光

霜寒輒蠶體

滴地酒成凍喧天鴉訴寒窗風經怒響簾日漏溫痕偶
爾尋梅去其如駐屐難沙鷗脚不襪故故踏冰翻

晚晴獨酌

霜熟寒輕際晚時簾間過影一鴉歸夕陽端與誰為地
只照游塵絮樣飛

城頭曉步

古城秋後不勝荒人跡新行一逕長竹影已搖將午日
草根猶有夜來霜

懷古堂前小梅漸開

梅邊春意未全回淡日微風暗裏催近水數枝殊小在

一梢雙朵忽齊開生愁落去輕輕折不怕清寒得得來
腸斷故園千樹雪大江西處亂雲堆

隨意行穿翠篠林暗香撩我獨關心遙看小朵不勝好
走近寒梢無處尋未吐誰知膚底雪半開猶護蕊頭金
老來嬾去渾無緒奈此南枝索苦吟

絕豔元非著粉團真香亦不在鬚端何曾天上冰玉質
却怕人間霜雪寒枝似去年仍轉瘦花於來歲定誰看
老夫官滿梅應熟齒軟猶禁半點酸

揀得疎花折得回銀瓶冰水養教開忽然燈下數枝影
喚作窗間一樹梅歲律又殘還見在我頭自白不須催
相看姑置人間事嚼玉餐香嚥一杯

觀雪

坐看深來尺許強偏於薄暮發寒光半空舞倦居然懶
一點風來特地忙落盡瓊花天不惜封他梅蕊玉無香
倩誰細撚成湯餅換却人間煙火腸

雪晴

銀色三千界瑤林一萬重新晴天嫩綠落照雪輕紅兒
劣敲冰柱身清墮惡宮何須師鮑謝詩在玉虛中

晴後雪凍

負暄尚覺日無功炙手仍愁火失紅本是雪前風作雪
却綠雪後雪生風四郊凍合如相約七日晴來不宵融
舊說醉鄉堪避暑避寒也合此鄉中

雪凍未解散策郡圃

積雪偏工霽後凝不妨冷極不妨清靜聞簷滴元無雨

倒挂冰牙未怕晴獨往獨來銀粟地一行一步玉沙聲
園中散策饒君強敢犯霜風上古城

雪後十日日暖雪猶未融

地凍雪起立簷生冰倒垂日穿銀筍透風作玉山歌今
曉還差暖清寒退尚遲生愁便消去將底伴銀牋

寒雀

百千寒雀下空庭小集梅梢話晚晴特地作團喧殺我
忽然驚散寂無聲

雪夜侯迎使客

六花不放一塵生
晴後猶餘十日凝
新月未光輸與雪
夜風儘冷只留冰
侯迎銀漢槎頭客
挑盡玉蟲窗外燈
紙帳蒲團地爐暖
自憐不及草菴僧

寄題石湖先生范至能叅政石湖精舍

萬頃平湖石琢成
尚存越壘對吳城
如何豪傑干戈地
却入先生杖屨聲
古往今來真一夢
湖光月色自雙清
東風不解談興廢
只有年年春草生

郡圃殘雪

南風融雪北風凝
晚日城頭已可登
莫道雪融便無跡
雪融成水水成冰

城外城中雪半開
遠峰依舊玉崔嵬
池冰綻處纔如線
便有鴛鴦浮過來

梅露堂藏客夜歸

藥玉船中酒似空
水沉煙上雪都融
梅堂客散人初靜
椽燭燒殘一尺紅

十二月廿一日迎春

星淡孤螢月一梳迎春早起正愁予土牛只解催人老
春氣自來何事渠官柳野梅殘雪後金幡玉勝曉光初却
思歸跨春山犧繭栗仍將挂漢書

正月三日驟暖多稼亭前梅花盛開

春被梅花抵死催今年春向去年回春四十日梅初覺
一夜商量一併開

却緣臘雪勒孤芳等待晴光灑麝囊小立樹西人不會

東風供我打頭香

歲之二日欲遊翟園因寒風而止

歲前問尋翟園梅不知作麼不宵開歲後遣人訪消息
春風一夜花都拆老夫聞此喜欲顛小兒終夕不成眠
南京北果手自釘漆榼銀瓶色相映千騎朝來填戟門
雙旌已復指梅園東風無端動地起橫作清寒止游子
老夫孤悶搔白頭小兒勸翁翁勿愁人言好事莫作意
雨妬風憎鬼神忌欲游不必言阻游不必計從今只揀

天色佳走就梅花求一醉

戲題所見

田家不遣兒牧豬老烏替作牧豬奴不羞卑冗頗得志
草根更與豬為戲一烏驅豬作轂觫一烏騎豬作駢驥
騎之不穩驅不前坐看頑鈍手無鞭人與馬牛雖各樣
一生同住烏衣巷叱聲啞啞喙欲乾豬竟不曉烏之言
騎者不從驅者鬪爭牛訟馬傍無救豬亦自食仍自行
一任兩烏雙鬪爭不緣一童逐烏起兩烏頃刻鬪至死

梅花下遇小雨

偶來花下聊散策落英滿地珠為席繞花百匝不忍歸
生怕幽芳怨孤寂仰頭欲折一枝斜自挿白鬢明烏紗
傍人勸我不用許道我滿頭都是花初來也覺香破鼻
頃之無香亦無味虛疑黃昏花欲睡不知被花薰得醉
忽然細雨濕我頭雨落未落花先愁三點兩點也不惡
未要打空花片休

落梅有歎

纔看臘後得春饒愁見風前作雪飄脫蕊收將熬粥吃
落英仍好當香燒

郡治燕堂庭中梅花

林中梅花如隱士只多野氣無塵氣
庭中梅花如貴人也無野氣也無塵不疎不密隨宜了
旋落旋開無不好珠簾遣風細為吹畫簷護霜寒更微
詩翁繞堦未得句先送詩材與翁語有酒如渑誰伴翁
玉雪對飲惟渠儂翁欲還家即明發更為梅兄留一月

雨後曉起問訊梅花

前日看梅風吹倒昨日看梅雨霧帽近梅一日或再來遠梅隔年纔一到夜來為梅愁雨聲挑燈起坐至天明不知消息平安否早來問訊還疾走橫枝雨後轉清妍玉容洗妝晨更鮮絕似孤山半峰雪不羨玉井十丈蓮十事八九不如意人生巧墮天公計簿書海底白人頭孤負江南風月秋憶昔少年命同社月裏傳觴梅影下一片花飛落酒中十分便罰瑠璃鍾如今老病不飲酒

梅花也合憐衰翁

塲上感春

長塲無事不耐靜若非織紝便磨鏡竹君不作五斗謀
風前折腰也如磬先生節裏城上嬉朝遊暮遊不宵歸
晴空大聲斗作惡萬鴉退飛一鴉落乃是黑風江北來
更將黑雲頭上堆翻手為晴覆手雨自晴自雨何須怒
先生不妨且覓句挽之不來推不去坐着梅花一萬枝
化成粉蝶作團飛紛紛掠面收不得稍稍積砌吹還稀

落盡梅花天不管晚來許寒朝許暖一年待春春不回
一年探梅梅不開春回今纔幾許日梅開如何頓蕭瑟
少壯幾時奈老何落花未抵春愁多

觀小兒戲打春牛

小兒著鞚鞭土牛學翁打春先打頭黃牛黃蹄白雙角
牧童綠蓑笠青箬今年土脉應雨膏去年不似今年樂
兒聞年登喜不飢牛聞年登愁不肥麥穗即看雲作帚
稻米亦復珠盈斗大田耕盡却耕山黃牛從此何時閒

謝親戚寄黃雀

萬金家書寄中庭牘背仍題雙掩并不知千里寄底物
白泥紅印三十瓶甕瓶淺染茱萸紫心知親賓寄鄉味
印泥未開出饒水印泥一開香撲鼻江西山間黃羽衣
純綿被體白如脂偶然一念墮世網身插兩翼那能飛
誤蒙諸公相俎豆月裏花邊一杯酒先生與渠元不疎
兩年眼底不見渠端能訪我荆溪曲願借前籌酌醞釀

得小兒壽俊家書

父子初別雙淚垂
別我既久忘却思
忽得一書喜且悲
恰似向來初別時
汝翁在官緣索米
吾兒在家勉經史
舉頭三四百里亘
山啼鳥偏入耳詩成
自哦只自知便風
不敢寄吾兒汝望
白雲穿却眼若得
此詩恐腸斷徑須
父子早歸田粗茶
淡飯終殘年

書莫讀

書莫讀詩莫吟
讀書兩眼枯見骨
吟詩八字嘔出心人
言讀書樂人言吟
詩好口吻長作秋
蟲聲只令君瘦令

君老君瘦君老且勿論傍人聽之亦煩惱何如閉目坐
齋房下簾埽地自焚香聽風聽雨都有味健來即行倦
來睡

春草

天欲遊人不踏塵一年一換翠茸茵東風猶自嫌蕭索
更遣飛花繡好春

年年春色屬垂楊金撚千絲翠萬行今歲草芽先得計
攬它濃翠奪它黃

小瓶梅花

梅萼纔開已亂飛
不堪雨打更風吹
蕭蕭只隔窗間紙
瓶裏梅花總不知

夜坐

繡簾無力護東風
燭影何曾正當紅
獸炭貂裘猶道冷
梅花不易立霜中

寒宵老眼只長醒
蝴蝶頻催夢不成
不是三更三四點
如何一睡到天明

鳩啣枝營巢樹間經月不成而去

鳩婦那知自不材樹陰疎處起樓臺可憐積木如山樣
一桷何曾架得來

鵲營巢既成為鳩所據

乾鵲平生浪苦辛一年卜築一番新如何月下空三匝
宅子還將住別人

上元前大雪即晴

臘前三百已奇絕年後六花仍作團纔定勿心斜偏有思

欲消還凍不勝寒且留大地萬銀屋要伴青天孤玉盤
今歲上元君記取紅燈白月雪中者

郡中上元燈減舊例三之二而又迎送使客

紅錦芙蓉碧牡丹今番燈火減前番雪泥沒膝霜風緊
也有遊人看上元

北使纔歸南使來前船未送後船催元宵行樂年年事
兒女嗔人夜不回

憶昔三衢看上元玉虹橫貫水精簾窮州今日酸寒殺

老眼者來自不歡

兒時行樂幾時愁老去情懷懶出遊市上人家重時節
典釵賣釧買燈球

不是東風巧剪裁如何春夜碧蓮開江城寂寞無歌舞
喚得梅花勸一杯

雪後樓臺欲暮時遊人只道上燈遲月輪貼在梅花背
錯認梅枝作桂枝

村裏風回市裏聲月中人看雪中燈滿城只道歡猶少

不道譙門冷似冰

郡圃杏花

小樹嫣然一兩枝
晴薰雨醉總相宜
纔憐欲白仍紅處
政是微開半吐時
得幸東風無與對
主張春色更還誰
海棠穠麗梅花淡
匹似渠儂別樣奇

迥出千花合受降
不然受拜亦何妨
行穿小樹尋晴采
自挽芳條嗅暖香
却恨來時差已晚
不如清曉看新妝
朗吟清露溫風句
惱殺詩翁只斷腸

華堂秀才著六經解以長句書其後

河圖三畫已剩著堯典萬言猶欠却向來潛聖天何言
六經非渠一手作杏花壇下撥不開天公更遣麒麟催
乾坤造化登青竹沫泗光芒付綠苔堂上書生真苦相
蠹簡嚼穿渾不放屋上架屋更屋上後千萬年作何樣
華元夜登子反牀華堂晨趨孔子堂當時浪說析骸骨
今日覃思雕肺腸華君將身博凍餒毛穎可憐被何罪
君不見老農驅牛耕壠頭稻雲割盡牛亦休毛穎為君

禿盡髮問君何時放渠歇短檠青燈明復滅

春夜孤坐

梅花雪後杏花風老面逢春只強紅詩句行來行去裏
情懷不醉不醒中

休日城上

望中遠樹各依行春後新晴未斷霜池面得風呈縞碧
梅鬚經雨褪危黃

東窗梅影上有寒雀往來

梅花寒雀不須摹日影橫窗作畫圖
寒雀解飛花解舞君看此畫古今無

燒香

小閣疎櫺春晝長沉煙半穗弄輕黃老鈴略不知人意
故故搴簾放出香

探春

五日纔能一日來眼生方覺有春回向來日日頻來探
只道園花不肯開

晚晴

風吹點滴曉簷聲雲散朦朧晚日明楊柳染絲纔喜雨
梅花泣玉却祈晴

先生老態似枯禪邂逅東風也欲顛纔雨更晴寒便暖
四時佳處是春天

理髮

髮脫心知不再生新年底急頡星星城邊老柳也欺我
春裏滿頭依舊青

晚照

閒對斜陽數隙塵何曾萬事一關身湯瓶得火自相語
酒殘為人先作春

新除廣東常平之節感恩書懷

已愧雙旌古晉陵更堪一節古羊城偶逢舊治年頻熟
忽署新銜手尚生山與君恩誰是重身如秋葉不勝輕
向來百鍊今繞指一寸丹心白日明

芥齋

此薑馨辣最佳蔬荪芥芳心不讓渠蟹眼嫩湯微熟了
鵝兒新酒未醒初棗香醋釀作三友露葉霜芽知幾鋤
自筭枯腸成破甕一生只解貯寒菹

辭滿代者未至

一麾來此恰三年到得終更分外難老眼看燈渾作暈
愁心得酒不成歡

行圃

摘杞搜枯梗攀花脫脆包蝶呈新樣粉柳送隔城梢

淡天薄日倦春遊
蒼檜叢篁引徑幽
忽有小風人未覺
齊花無數總搖頭

春半問歸雁

春光深淺沒人知
我正南歸雁北歸
頭上一聲如話別
一生長是背人飛

毗陵辭滿出舍添猝廳

小住丞廳更一旬
客魂先入故鄉春
未離鼓角聲中夢
已是譙門外面人

寓倅廳寒夜不寐

不堪斜雨打虛窗只願晴陽送曉光
自是老人眠不著近來春夜幾曾長
樓頭吹動梅花曲夢裏猶疑燕寢香
道是官居如客舍等閒一宿兩年強

遊翟園

花枝劣相綃人衣蜂子顛狂觸面皮
一巷海棠千架錦兩堤楊柳萬窩絲

宋詩鈔卷七十二



總校官庶吉士臣張能照
校對官檢討臣王鍾健
謄錄監生臣趙之璧

欽定四庫全書叢要

集部

宋詩鈔卷七十三

四

詳校官候選知縣臣吳旬華



欽定四庫全書叢要卷二萬三百二十六

集部

宋詩鈔卷七十三

內閣中書舍人吳之振編

楊萬里西歸集鈔

初離常州夜宿小井清曉放船

攔街父老不教行出得東門已一更一事新來偏可意
夢中閒打放船鉦

晨炊只煮野蔬湯更揀鮮魚買一雙病眼未能禁曉日

西窗莫閉閉東窗

春旱愁人是去年如今說著尚心酸
篤師莫遣船遲著見說蘇州好牡丹

雨中遠望惠山

准擬歸時到未遲歸時不到悔來時
惠山不識空歸去枉與常州作住持

舟中雨望

船窗深閉懶看書獨倚船門燃白鬚
雨共長河織青錦

金錢暈上滴真珠

曉經潘葑

油窗著雨光不濕東風忽轉西風急蓬聲蕭蕭河水澁
牽船不行人却立雨中篙師風墮笠潘葑未到眼先入
岸柳垂頭向人揖一時喚入誠齋集

惠山雲開複合

二年常州不識山惠山一見開心顏只嫌雨裏不仔細
鬢鬟隔簾青玉鬟天風忽吹白雲坼翡翠屏開倚南極

政緣一雨染山色未必雨前如此碧看山未了雲復還
雲與詩人偏作難我船自向蘇州去白雲穩向山頭住

泊舟無錫雨止遂遊惠山

天教老子不空回船泊山根雨頓開歸去江西人問我
也曾一到惠山來

出惠山遙望橫山

三日橫山反覆看殷勤送我惠山前常州更在橫山外
只望橫山已杳然

舟過望亭

常州盡處是望亭已離常州第四程柳線絆船知不住
却教飛絮送儂行

此去蘇州半日期歸心長是覺船遲一村樹暗知何處
兩岸草青無了時

將近許墅望見虎丘

許墅人家遠樹前虎丘山色夕陽邊石橋分水入別港
茆屋垂楊依釣船

泊船百花洲登姑蘇臺

二月盡頭三月初繫船楊柳拂菰蒲姑蘇臺上斜陽裏
眼度靈巖到太湖

舟中小雨

漠漠輕寒粟脫膚酴醿半落牡丹初顛風無賴難拘管
小雨多情為破除半世光陰行路裏一年春事客愁餘
浙西尚遠江西在何日漳濱買白魚

從范至能叅政遊石湖精舍坐間走筆

孤墳鷗邊迥千巖鏡裏看折花倩人插摘果護窗寒不是無相識相從却是難歸舟望精舍已在白雲端

震澤分波入垂虹隔水看何須小風起生怕牡丹寒政坐諸峯好端令落筆難催人理歸棹落日許無端

再登垂虹亭

長年三老不須催且據閒牀未擬回白晝驚人星滿地
日光碎處萬波來

夜泊平望終夕不寐

船中新熟睡難成。聽盡漁舟掠水聲。不分兩窗窗外月。
如何不為別人明。

櫻桃湖裏月如霜。偏照征人寸斷腸。醉裏不知家尚遠。
夢回忽覺路初長。

一生行路便多愁。落得星星兩鬢秋。數盡歸程到家了。
此身猶未出蘇州。

小泊梅堰登明孝寺

泊船梅堰日微昇。一逕深深喚我登。隨分垂楊兼老檣。

備員野寺更殘僧

宿湖甫山

夜泊湖南山綠楊護危堤迅雷將殘雨似猛竟復微曉
月解風纜熟睡初不知起來問宿處千山翠相圍霽峰
有刺靄旭溪無倚輝遠樹蘆外出若與船爭馳多情更
林墮寸步不相離後送欣已遠前迎復在茲不知墮意
厚為復船行遲誰能仆此墮庶不淹吾歸獨感夜來雨
政作朝涼資

過雪川大溪

菰蒲際天青無邊只堪蓮蕩不堪田中有一溪元不遠
摺作三百六十灣政如綠錦地衣上玉龍盤屈於其間
前船未轉後船隔前灣望得到不得及至前灣到得時
只與後灣纔咫尺朝來已度數百縈問知德清猶半程
老夫乍喜櫂夫悶管有到時君莫問

雪溪

道塲山背是吳興只不教人到德清雪水相留無別計

却將溪曲暗添程

晨炊白昇山

俗傳葛仙翁於此
白日昇天故名

千峰為我旋生妍我為千峰一灑然雲掠石崖啼鳥樹
雨添山澗落花泉心知童僕多飢色目斷茅簷半穗煙
只道晨炊食無肉竹根斤筍兩三錢

小舟晚興

箬蓬舊屋雨聲乾蘆葦新簷暖日眠枕底席邊俱綠水
脚根頭上兩青天

人在非晴非雨天
船行不浪不風間
坐來堪喜還堪恨
看得南山失北山

潮痕初落水猶肥
雨點纔來已復微
半濕岸沙危欲落
牽船稚子去如飛

一船在後忽撓前
前後篙師各粲然
山入春來肥更秀
向人依舊聳寒肩

過橫山墖下

六年三度過蘭溪
總是殘春首夏時
最感橫山山上墖

迎人東去送人西

宿潭石步

三更無月天正黑電光一掣隨霹靂雨穿天心落蓬脊
急風橫吹斜更直疎篷穿漏濕牀席波聲打枕一紙隔
夢中驚起眠不得攬衣危坐三歎息行路艱難非不歷
平生不曾似今夕天公嚇客惡作劇不相關白出不測
收風拾雨猝無策如何乞得東方白垂頭縮腳正幅仄
忽然頭上復一滴

過安仁市得風挂帆

西望柯山正蔚藍衢州只在此山南却愁路盡風猶剩
回納清風與破帆

舟中戲題

花處青山柳處溪新來宿處舊曾欵到家失却行程歷
只檢西歸小集詩

上章戴灘

脫巾枕手仰哦詩醉上諸灘總不知回看他船上灘苦

方知他看我船時

三月二十七日送春絕句

只餘三日便清和儘放春歸莫恨他落盡千花飛盡絮
留春肯住欲如何

春盡感興

春事忽忽掠眼過落花寂寂奈愁何故人南北音書少
野渡東西芳草多荀借一風爭作竹鶯分數子別成窠
青燈白酒長亭夜不勝孤舟兀綠波

明發三衢

拔盡新秧插盡田出城一眼翠無邊不關雨水愁行客
政是年年雨水天

衝風破雨正愁人愁得心情沒半分何處吹來好消息
諸峰放散夜來雲

雲欲開時又不開問天覓陣好風催雨無多落泥偏滑
溪不勝深岸故頹

插秧歌

田夫拋秧田婦接小兒拔秧大兒插笠是兜鍪是甲
雨從頭上濕到胛喚渠朝餐歇半霎低頭折腰只不答
秧根未牢時未匝照管鵝兒與雛鴨

明發平坦市

花飛滋曉寒葉暝新夜聽萬象宿雨餘潔齋無欠淨霽
曦輒欲吐遠峯忽復暝林廬居者誰戶與碧山映薔薇
上木末不架得初性彼臥晏未興我征漂靡定悄然慄
吾廬花竹幽更盛茲焉獨足羨自視不差勝顧瞻江之

西心速路逾夏但聞前溪水盡還舊沙徑

江山道中蠶麥大熟

黃雲割路幾肩歸紫玉炊香一飯肥却破麥田秧晚稻
未教水牯卧斜暉

新晴戶戶有歡顏曬繭攤絲立地乾却遺繅車聲獨怨
今年不及去年閒

午憩

嫩綠桐陰夾道渡爛紅野果壓枝斜日烘細草香無價

况有三枝兩朵花

過髦塘渡

雪浪無堅岸金沙有退痕斷橋猶半板漱樹欲枯根為
問新來漲今年第幾番昨來愁此渡已濟不堪論

度小橋

危橋度中半深溪動人心欲返業至此將進眩下臨已
涉尚回顧溪水知幾深誰能大此橋以安往來人

小憇二龍爭珠蓋兩長嶺夾一圓峯故名自此出

官路入山路云

田路直復繁肩輿斜還正如何晴三日猶自滑一徑缺
岸有危棧方軫無穩興不跌先獨驚稍坦深自慶肯信
坐者安不及行者病昨來九軌塗可思不可更忽逢兩
蒼虬爭此一照乘頗欲問故老雙爭誰孤勝水聲亂入
語一辭無真聽輕風從秧疇衆綠久未定崎嶇從此始
辛苦何時竟

早炊楊家塘

枯樹藤為葉遙峰石作鬟如何每行客不勸自加餐
浙界殘零處江東咫尺間炊煙戀茅店飛出却飛還

四月四日午初出浙東界入信州永豐界

外面千峰合中間一徑通日光自搖水天靜本無風
村酒渟春綠林花倦午紅莫欺山堠子知我入江東

松陰小憩

不但先生倦不蘇僕夫也自要人扶青松數了還重數
只是從前八九株

宿靈鷲禪寺

暑中帶汗入山中霜滿風篁雪滿松只是山寒清到骨
也無霜雪也無風

初疑夜雨忽朝晴乃是山泉終夜鳴流到前溪無半語
在山做得許多聲

道傍小憇觀物化

蝴蝶新生未解飛鬚拳粉濕睡花枝後來借得風光力
不記如癡似醉時

晨炊玉田聞鶯觀鷺

曉寒顧影惜金衣
著意聽時不肯啼
飛入柳陰多處去
數聲只許落花知

清溪欲下影先翻
隻鷺還將雙
綠玉脰長聊試淺
素瓊裳冷不禁寒

永豐驛逢故人趙伯庭過叔

同官賴水總青春消息中間兩不聞
道我未衰君莫戲
不須看我只看君

出永豐縣西石橋上聞子規

花愁月恨只長啼雨夕風晨不住飛出自錦江歸未得
至今猶勸別人歸

怨笛哀箏總不如一聲聲徹九天虛若逢雨後如何聽
幸得花時莫管渠

詩情

只要凋詩不要名老來也復咸詩情虛名滿世真何用
更把虛名賺後生

四月十三日渡鄱陽湖

湖心一山曰康郎山其狀如蛙浮水上

泊舟鄱若湖風雨至夜半求濟敢自必苟安固所願孤
愁知無益暫忍復永歎夜久忽自睡倦極不知旦舟人
呼我起順風不容緩半篙已湖心一葉恰鏡面仰見雲
衣開側視帆腹滿天如瑠璃鍾下覆水晶枕波光金汁
濶日影銀柱貫康山杯中蛭廬阜帆前幔豁然地無蒂
渺若海不岸是身若虛空御風游汗漫初憂觸危濤不
意拾奇觀近歲六暄涼此水三往返未涉每不寧既濟

輒復玩游倦當自歸非為猿鶴怨

已至湖尾望見西山

好風穩送五湖船萬頃銀濤半霎間已入江西猶未覺
忽然對面是西山

蘆荻中間一港深蓑蒿如柱不成簪正愁半日無村落
遠有人家在樹林

千里都無半點山如何敢望有人煙不教遠樹遮攔却

蘆荻生來直到天

送鄉人余文明勸之以歸

一別高人又十年霜筋雪骨健依然席門未害車多轍
斗酒尚能詩百篇蒼狗白衣俱昨夢長庚孤月自青天
故山松菊平安在何日歸歟解釣船

送王季山主簿省親樞府

六館名流王季山十年風雨短檠寒不曾文字饒羣子
勉為庭闈就一官伯也騰身紫極上叔兮著眼白雲端
會當再奏河東賦姓字從頭揭榜看

秋蟲

蟬哀落日恰纔收蛩怨黃昏正未休催得世人頭總白
不知替得一蟲愁

病中感秋時初喪壽佺子

臨曉睡偏重不知窗已明高梧下清露宿鳥有寒聲愁
豈關鬚事秋來添雪莖病身仍哭子併作老來情

秋熟

多難幽懷慘不舒秋風殘暑埽難除一生最怕西窗日

長是酴醿架子疎

年年極暑與秋期
日日秋陽在暮時
我自愁吟無意思
蟬聲移近入簷枝

夜坐

夜永留清坐
詩臞稱病容
溪鳴風處竹
月濕露中松
喜事何曾夢
燈花誑殺儂
欲歸歸已得
歸得却無悰

中秋病中不飲二首後一首用輓轤體

去年兩浙浙西州
今夕南溪溪上頭
滿著玻瓈一盆水

洗開玉鏡十分秋病來不飲非無酒老去追懼總是愁
自笑獨醒仍苦詠枯腸雷轉不禁搜

無風無雨併無雲今歲中秋儘十分畢竟冰輪誰為轉
碾穿玉宇不生痕坐着兒輩紛然飲也遣先生半欲醺
自是清尊負明月不關明月負清尊

中秋月長句

西山走下丹砂丸東山飛上黃金盤徑從碧海升青天
半濕尚帶波濤痕初輝淡淡寒不動月華猶輕桂華重

黃羅團扇暗花紋蹙金突起雙龍鳳須臾正面天中央
銀鉢退盡向來黃乾坤鎔入冰壺裏萬象都無只有光
平生愛月愛今夕古人與我同此癖去年中秋天漆黑
今年中秋月雪白先生舊不論升斗近來畏病不飲酒
月中醒眼搔白首明年月似今宵否

秋雨初霽

松竹陰寒分外蒼芭蕉花濕夢中香抽身朱墨塵埃裏
入眼山林氣味長今日更無秋熟苦曉晴猶帶雨餘涼

却將白髮三千丈綠作霜絲補錦囊

病後覺衰

病著初無惱安來始覺衰人誰長健底老有賴來時山
意淒寒日秋光染瘦詩小松能許劣學我美吟髭

昨日訪子上不遇裴回庭砌觀木犀而歸再以七

言乞數枝

昨攜兒輩叩雲闊繞遍巖花恣意看苔砌落深金布地
水沉蒸透粟堆盤寄詩北院賒秋色供我西窓當晚餐

小朵出叢須折却莫教折破碧團欒

拒霜花

木渠何似水芙蓉
渠同箇聲名各自都
風露商量借膏沐
臘脂深淺入肌膚
喚回春色秋光裏
饒得紅妝翠蓋無
字曰拒霜渾不惡
却愁霜重要人扶

不寐

老來只願酒難醒
酒力纔醒夢便驚
露滴新寒欺病骨
宦遊如夢記平生
深山五鼓雞吹角
落月一窗鵝打更

等待曉光稠好句曉光未白句先成

非關枕上愛哦詩聊復銷愁片子時老眼強眠終不夢
空腸暗響訴長飢翻來覆去體都痛乍暗忽明燈為誰
只道晝長無那著夜長難禁不曾知

暗蟲夜啼不肯停直從黃昏啼到明不知討論底事著
為復怨嗟誰子生至竟通宵千萬語真實只是兩三聲
唧唧唧唧復唧唧此外何言君試聽

初聞一犬兩犬聲次第遠近雞都鳴今日明朝何日了

南村北巷幾人行
忽思春雨宿茅店
最苦僕夫催去程
是時懶起惜殘睡
如今不眠愁獨醒

戲題常州草蟲枕屏

黃蜂作歌紫蝶舞
蜻蜓蚱蜢如風雨
先生畫眠紙帳溫
無那此輩喧夢魂
眼中了了華胥國
蜂催蝶喚到不得
覺來忽見四摺屏
野花紅白野草青
勾引飛蟲作許聲
何緣先生睡不驚

和李與賢投贈之韻

山似剡溪溪似油人如詩句句如秋無邊春裏花饒笑
有底忙時草喚愁

寄題李與賢似剡菴

四明狂客一茅屋勅賜剡川繞一曲安福詩人李與賢
大書似剡山扉前我曾著脚勾踐國奉詔昭陵省松柏
是時八月欲半頭鏡湖不是人間秋嵇山影落水精闕
荷花露滴波中月季真茅屋荒蒼苔古木哀猿啼禹穴
今君結屋阿那邊疋似剡川若箇言我到剡川君未到

似和不似然不然君不見興公舊草天台賦元不曾識
天台路一俛仰間已再升何用瘦藤與芒屨

蕙花初開五言

幽人非愛山出山將何之山居種蘭蕙歲寒久當知初
栽止百畝餘地惜奚為先生無廣居千巖一茅茨四面
祇栽蕙中間纔置錐銳綠分宿叢修紫擢幼枝孤榦八
九花一花破初蕤西風淡無味微度成香吹燈夢得幽
馥月寫傳靜姿我欲掇芳英和露充晨炊忽然惻不忍

環玩真忘飢。豈無衆花草。不願秋卉遲。種時亂不擇。歲晚悔可追。

木犀落盡有感

一歲秋香又一空。落英顛賴怨西風。閉時占斷西風曉。
豈念荷花脫病紅。

戲筆

野菊荒苔各鑄錢。金黃銅綠兩爭妍。天公支與窮詩客。
只買清愁不買田。

我詩只道更無題物物秋來總是詩著意染鬚玄尚白

梳頭得蠱素成縕

飯罷散策遇細雨

秋暄團扇尚堪搆病脚朝來健似飛偶到溪頭晴喚出

未窮山頂雨催歸

重九日雨菊花仍未開用輶轎體

良辰巧與賞心違四者能并自古稀恰則今年重九日
也無黃菊兩三枝閉門幸免吹烏帽有酒何須望白衣

正坐滿城風雨句平生不喜老潘詩

西齋睡起

小睡西齋聽雨涼竹雞聲裏夢難長
開門山色都爭入只放青蒼一冊方

讀陳蕃傳

仲舉高談亦壯哉白頭狼狽只堪哀
枉教一室塵如積天下何曾歸得來

夜寒獨覺

兒啼驚覺夢中身恰則華胥正問津脚到五更偏作冷
老來萬事不如人若無窗月誰相伴聽盡雞聲不肯晨
尚有布衾寒似鐵無衾似鐵始言貧

雨晴得毗陵故舊書

雀聲只喜晚晴新不管畦蔬雨未勻日與山光美秋色
風將竹影埽窗塵多時浙右無消息忽有書來問老人
知我近來頭白盡寒暄語外更情親

憂患感歎

老去情懷已不勝
愁邊災患更相仍
胷中莫著傷心事
東處銷時西處生

霜曉

荒荒瘦日作秋暉
稍稍微暄破曉霏
只有江楓偏得意
夜接霜水染紅衣

慶長叔招飲一杯未醻雪聲璀璨即席走筆賦十

詩

晚飲西隣大阮家
天風吹雪入簷牙
呼童淨埽青苔地

莫遣纖塵涴玉花

長廊盡處繞梅行過盡風聲得雪聲醉裏不愁飄濕面
自舒翠袖點瓊英

老手那知鬢脚凋忍寒拚命着珠跳却嫌地暖無冰凍
恰則飛來恰則銷

梅花得雪更清妍折入燈前細看下却珠簾教到地
橫枝太瘦不禁寒

雪正飛時梅正開情人和雪折庭梅莫教顛脫稍頭雪

千萬輕輕折取來

急雪穿簾繞蠟燈
梅花微笑古銅餅
朔風惡極驚人殺
吹倒琉璃六曲屏

南烹北果聚君家
象箸冰盤物物佳
只有蕉霜分不得
老夫自要嚼梅花

不是今朝雪不清
只愁清殺老書生
不知落得幾多雪
做盡北風無限聲

酒香端的似梅無
小摘梅花浸酒壺
莫遣南枝獨醒著

一杯聊勸雪肌膚

燕寧軒裏集羣仙薄宦歸來又兩年梅影舞風風舞雪
勸人何苦怯金船

克信弟坐上賦梅花二首

對酒初驚髮半華折梅還覺興殊佳如何屋角西南月
只照梢頭一兩花自是向來香寂寞不須更道影橫斜
北枝別有春無價和靖何曾覓得此

月波成露露成霜借與南枝作淡妝寒入玉衣燈下薄

春撩雪骨酒邊香却於老樹半枯處忽走一稍如許長
道是疎花不解語伴人醒醉替人狂

送談命曾南翔

今年見說也無錐政坐談天泄密機舉世近來憎直語
貴人剩許未為癡

寄題萬安縣劉元龜橫秀閣

玉簪成陣雪成堆秀氣橫空撥不開楚岫蒼寒五雲外
賴江白寫九天來煙銷日出皆詩句月色波聲喚夢回

早晚攜家過高閣寄詩聊當一枝梅

春盡舍舟餘杭雨後山行

前夕船中索簾眠今朝山下覺衣單春歸便肯平平過
須做桐花一信寒

十二月二十七日大雪中過吉水小盤渡西歸

風卷寒江浪濕天斜吹亂雪忽平船碧琉璃上瓊花裏
獨載詩人孟浩然

山居雪後

春近能餘幾許寒雪花繞落便消殘青松根上蘭根下
猶得三朝兩日看

一點紅塵未敢生松間雪後政堪行日光半破風微度
時作高林落果聲

宋詩鈔卷七十三